

歐陽修全集

國學基本文庫



上海中央書店
印書行

庫文本基學國

集全修陽歐

著叔永陽歐

冊四第

行印店書央中海上

內制集序

昔錢思公嘗以謂朝廷之官雖宰相之重。皆可雜以它才處之。惟翰林學士。非文章不可。思公自言爲此語。頗取怒於達官。然亦自負以爲至論。今學士所作文書多矣。至於青詞齋文。必用老子浮圖之說。祈禳祕祝。往往近於家人里巷之事。而制詔取便於宣讀。常拘以世俗所謂四六之文。其類多如此。然則果可謂之文章者歟。余在翰林六年。中間進拜三三大臣。皆適不當直。而天下無事。四夷和好。兵革不用。凡朝廷之文。所以指麾號令。訓戒約束。自非因事。無以發明。矧余中年早衰。意思零落。以非工之作。又無所遇以發焉。其屑屑應用。拘牽常格。卑弱不振。宜可羞也。然今文士。尤以翰林爲榮選。余旣罷職。院吏取余直草。以日次之。得四百餘篇。因不忍棄。況其自上朝廷。內及宮禁。下暨蠻夷海外。事無不載。而時政記日曆。與起居郎舍人所有。略而不記。未必不有取於斯焉。嗚呼。余且老矣。方買田淮潁之間。若夫涼竹簟之暑風。曝茅簷之冬日。睡餘支枕。念昔平生仕宦出處。顧瞻玉堂。如在天上。因覽遺藁。見其所載職官名氏。以較其人盛衰先後。孰在孰亡。足以知榮寵爲虛名。而資談笑之一噓也。亦因以誇於田夫野老而已。嘉祐六年秋八月二日。廬陵歐陽脩序。

內制集

卷一

太祖皇帝忌辰道場齋文九月八日

維至和元年歲次甲午九月辛酉朔十九日己卯。皇帝遣入內侍省內侍殿頭勾當太平興國寺開先殿劉立言請僧三七人於太平興國寺開先殿開啟太祖皇帝忌辰道場一月日。伏以受命開先。肇基興運。昭祖功而不顯。緣寶祚於無疆。用深追遠之誠。式奉明靈之薦。載嚴淨刹。以集善因。伏願覺力常資。威靈如在。延鴻宗祏。集慶眇冲。庶邦咸被於餘休。品物共均於博施。謹言。

太祖皇帝忌辰道場功德疏右語九月八日

右。伏以當天開運。聿隆創始之功。繼統承休。方罄奉先之孝。爰戒徽音之日。用資作善之祥。嚴法會於金園。啓靈文於貝葉。一作騰。伏願超登妙果。高證真乘。瞻不動以常存。祐無疆而永固。下均氓庶。咸獲乂寧。

賜宰臣陳執中生日禮物口宣九月八日

有勅。卿爲時柱石。秉國鈞衡。爰逢慶育之辰。宜有便蕃之錫。豈惟故事。式示眷懷。今差卿男將作監丞世儒。賜卿生日禮物。想宜知悉。

班荆館賜契丹國信使副赴闕御筵口宣九月八日

卿等載持信節。方止都圻。特申式宴之儀。以示勞勤之意。用推寵數。常體至懷。

撫問梓州路臣寮口宣九月十七日

汝等並輜器能。遠膺寄任。式戒嚴秋之序。載懷勤事之勞。宜示撫存。以彰眷厚。

班荆館賜契丹國信使副卻回御筵口宣九月十七日

卿等聘儀成禮。歸取戒塗。念茲夙駕之勤。宜有祖行之寵。式陳衍樂。以示宴私。

班荆館賜契丹國信使副卻回酒果口宣同日

卿等信節爰馳。示隣歡之永固。使軺云復。申飲餞以爲榮。宜有匪頒。以彰眷遇。

賜隴州團練使代州部署田辛等勅書九月十四日

勅田辛。省所進奉謝恩賜公使月俸馬一疋。事具悉。邊防有嚴。寄任尤重。嘉汝材武。董吾兵師。軍聲俾壯於威容。寵數宜優於廩賜。遠陳貢謝。益認傾輸。尙體眷懷。勿忘自效。故茲示諭。想宜知悉。秋冷。汝比好否。遺書。指不多及。

雄州白溝驛賜契丹人使卻回御筵兼傳宣撫問口宣九月二十日

卿等言持信節。式戒歸塗。念茲衝涉之勤。宜有撫存之意。仍頒宴餞。以示眷懷。

賜翰林學士尙書工部郎中知制誥王洙獎諭詔九月十四日

勅王洙。省監護使劉沆劄子。奏繳遲到少府監修製法物所狀。修製溫成皇后一行法物。勘會例各鮮明。及減省得物料功限甚多。事少府領五署之衆工。乃九卿之舊職。卿以儒學。參吾侍從。兼蒞其事。能勤厥官。俾天功簡而速成。物精而有法。益彰材敏。尤用款嘉。故茲獎諭。想宜知悉。

皇帝本命兗州會真宮等處開啓道場青詞九月二十日

維至和元年歲次甲午。十月辛卯朔。二十日庚戌。嗣天子臣某謹遣某人開啓本命靈寶道場三晝夜。罷取日

設醮一座。謹上啓。太上開天執符御歷含真體道玉皇大帝。寶祚無疆。黃穹垂祐。吉日式臨於元命。醮科爰舉於舊章。薦誠愍以惟精。延聖真而並集。仰希靈貺。敷錫眇冲。四時叶序於和平。品彙均休於康泰。無任懇禱之至。謹詞。

純隆觀開啓追薦溫成皇后道場青詞九月二十五日

伏以蒼圓降鑒。列象緯以昭垂。燭潔備陳。薦馨香而上達。載嚴仙宇。恭按科儀。眷內則之遺芳。冀高真之冥祐。仰祈陰貺。永助靈遊。

福康公主宅修築地基祭告太歲已下祝文九月二十七日

維至和元年歲次甲午。十月辛卯朔。七日丁酉。皇帝遣宮苑使榮州防禦使內侍省內侍右班副都知任守忠。致祭于太歲土地諸神。禮崇下嫁。詩美宜家。惟樂館之有初。方涓辰而叶吉。冀百靈之來護。期不日以斯成。尙饗。

雄州白溝驛撫問契丹賀正人使兼賜御筵口宣九月二十七日

卿等載馳一作瑞節爰及疆亭。顧惟夙勗之勤。宜有示慈之宴。用彰寵待。當體眷懷。

賜新除參知政事程戡讓恩命不允斷來章批答十月十二日

省表具之。朕有欲治之心而甚勞。思底治之方而未獲。夙夜于此。惟賢是求。卿出入宣勤。材望兼著。誠明發於事業。識慮可以詢謀。而召自外邦。參于宰府。朕志所定。其何可移。夫任之重者。憂實深。遇之隆者。報亦厚。讓而後受。雖敦難進而可嘉。知無不爲。其一乃心而圖效。所讓宜不允。仍斷來章。

賜寧遠軍節度使張茂實進謝恩馬四字無詔十月二十日

勅茂實。省所進奉謝恩賜公使并月俸及牌印到任馬共八疋事。具悉。卿出守蕃宣。宜優祿給。詔條方布。受署有初。印綬爲榮。古人所重。載披貢謝。深用歎嘉。故茲詔示。想宜知悉。

賜新授龍神衛四廂都指揮使英州團練使郝質勅書十月二十日

勅郝質。省所進奉謝恩授龍神衛四廂都指揮使英州團練使并賜公使月俸馬共二疋事。具悉。朕嘉汝有忠勇之材。遂膺擢豐汝以廩賜之厚。實示眷懷。貢奉所陳。勤誠已著。功名可勉。後效其思。故茲示諭。想宜知悉。

賜尚書工部侍郎余靖詔十月二十日

森爾盤桓。驚于海隅。卿起自家居。首宣勤力。至於大兵之後。撫彼凋殘。餘孽未平。推吾恩信。寄任實深。於委遇寵章。宜有於使蕃。遠聞貢輸。良增嘉歎。

撫問江南東西路臣寮口宣十月二十三日

汝等並以材賢一作賢材。出分寄任。薦更歲月。備著勞能。宜示撫存。以彰眷遇。

撫問鄜延路臣寮口宣十月二十六日

汝等並膺柬寄。綽著才猷。顧邊圉之肅然。嘉王事之勤止。屬茲寒沍。宜示撫存。

雄州撫問契丹賀正旦兩蕃人使口宣十一月九日

卿等夙將瑞節。方戒疆亭。奉隣聘以申歡。慶歲端之資始。載惟跋履。宜示撫存。

景福殿庫開啓冬節道場齋文十一月十二日

伏以國材豐衍。資民力以爲先。禁宇深嚴。邇天居而甚邃。式戒一陽之候。俾修衆善之因。誦貝葉一作之遺文。集金園之淨侶。庶延梵福。用副精衷。

軍器庫開啓冬節道場齋文十一月十二日

伏以儲戎器以戒不虞。敢忘武備。肇新陽而集多福。爰屆令辰。俾法侶之精虔。修勝因之妙善。仰瞻毫相。載釋真文。冀昭鑒之甫回。契偃兵之盛際。

舒州靈仙觀開啓上元節道場青詞十一月十五日

伏以萬物熙春。肇新陽於首歲。三元紀序。標令節於真經。爰卽靈場。俾遵科式。薦雖陳於菲薄。誠已達於精明。伏願穹昊垂休。紫清降鑒。邦家錫慶。永叶於泰寧。民物遂生。並臻於和樂。

恩州賜契丹皇太后賀正旦人使茶藥口宣同日

卿等載飭輶車。方凝寒律。乃顧道塗之役。深嘉跋履之勞。宜有頒宣。式彰眷遇。

恩州賜契丹皇帝賀正旦人使茶藥口宣同日

卿等繼修邦好。來及王春。方凝凜之在辰。念勤劬而將事。聊頒飲劑。式助宣調。

皇帝本命兗州會真宮等處開啓道場青詞十一月二十一日

伏以荷三靈之乃眷。獲奉寶圖。隆萬壽於無疆。遐貪道蔭。爰薦精衷之禱。及茲元命之辰。伏願誠潔上通。真靈甫鑒。如松之茂。永固於延長。一物雖微。並均於貺施。

醴泉觀真君殿開啓年交道場青詞十一月二十四日

伏以元氣均調。連三正而並用。歲功肇序。謹五始之惟初。爰啟福庭。一作恭陳淨醮。伏冀精衷上達。靈鑒甫回。却凝陰伏沴之餘。順和氣發生之造。旁霑庶物。並集多休。豈惟眇冲。膺此純嘏。

添修開先殿祭告土地祝文十一月二十七日

伏以神遊所格。祕寢有嚴。役事時興。方勤於締葺。一作神。祇安靜。頗懼於震驚。非薦式陳。明靈昭鑒。

恩州賜契丹皇太后賀正旦大使茶藥詔十一月十五日

勅。卿夙將信幣。來慶王春。載惟涉履之勤。方示眷懷之意。錫茲良物。以輔至和。今差入內侍省內侍殿頭張昭化往恩州。賜卿茶藥。具如別錄。至可領也。故茲詔示。想宜知悉。冬寒。卿比不安好。遣書。指不多及。

恩州賜契丹皇太后賀正旦副使茶藥詔十一月十五日

卿輜車載飭。方講於隣歡。歲序將回。式凝於寒律。載懷衝涉。宜有頒宣。

恩州賜契丹皇帝賀正旦大使茶藥詔十一月十五日

卿修南北之歡。會期於首歲。勤夙宵之役。方及於半途。彌切眷懷。宜加寵錫。

恩州賜契丹皇帝賀正旦副使茶藥詔十一月十五日

卿使介選才。以達欣歡之意。道塗將命。宜伸慰勞之恩。式示頒宣。俾茲調護。

兗州會真宮等處開啓上元節青詞十二月十五日

伏以萬物資生。肇新於陽月。三元紀節。式按於仙經。爰款殊庭。恭陳淨醮。薦精誠而交感。企真馭以來臨。冀集靈休。下均羣品。

二十四日就驛賜契丹賀正旦人使銀鈔羅唾孟孟子錦被褥口宣十二月十五日

卿等繼講隣歡。會期元日。載嘉勤敏。涉此凝嚴。用示頒宣。俾彰眷待。

正月一日入賀畢就驛賜酒果口宣十二月二十五日

卿等方梃聘車。卽安賓館。屬此春陽之煦。宜多宴衍之歡。寵錫有加。眷懷增厚。

今月三十日賜契丹賀正旦人使內中酒果口宣十二月二十五日

卿等式修邦聘。永會春朝。方休道路之勤。宜有宴私之惠。聊頒甘實。以侑清鱗。

正月三日就驛賜契丹賀正旦人使內中酒果口宣十二月二十五日

卿等聘儀交舉。欣入見於彤墀。蓬品有加。俾示慈於宴席。用伸頒賚。宜體便蕃。

賜契丹人使春幡春盤法酒口宣十二月二十五日

卿等並驅使傳。來及王正。初陽式應於新春。令節俾修於故事。宜加頒賚。用示眷懷。

內中福寧殿開殿三長月祝聖壽道場青詞

伏以真遊隨款。祕殿遂嚴。惟首月之正時。叶新陽而布慶。俾陳法供。仰薦明誠。伏冀靈祐眇躬。保千齡而永固。濟民壽域。均萬國以同休。

萬壽觀齋殿內權奉安真宗皇帝御容祝文十二月二十五日

伏以齋室潔嚴。辟容清穆。涓辰叶吉。具禮有儀。冀真馭之安安。符孝心之虔奉。

東太一宮兩殿祝聖壽年交金籙追場密詞十二月十日

伏以積陰窮候。始變於三陽。庶物更^{一作交}新。宜均於百福。是陳法供。載肅嚴祠。延真馭以來臨。冀明靈之洞鑒。眇冲集佑。期萬壽之無疆。遐邇同休。俾兆民之咸賴。

班荆館賜契丹賀正旦人使到闕酒果口宣

卿等夙戒輶軒。薦修信好。顧凝嚴之在候。宜宴錫以申恩。頒於甘新。彰予眷遇。

班荆館賜契丹賀正旦兩番人使到闕御筵口宣

卿等載馳隣聘。來及歲元。深惟道路之勤。方戒郊圻之近。特頒宴勞。以示眷懷。

春帖子詞二十首十二

月二十九日

皇帝閣六首

其一

萌芽發暖律。養育本仁心。顧彼蒼生意。安知帝力深。

其二

陽進升君子。陰消退小人。聖君南面治。一作敷布政教。法新春。

其三

氣候三陽始。勾萌萬物新。雷聲初發號。天下已知春。

其四

玉琯氣來灰已動。東郊風至曉先迎。乾坤有信如符契。草木無知但發生。

其五

朝雲藹藹弄春暉。萬木欣欣暖尙微。造化未嘗私一物。各隨妍醜自芳菲。

其六

熙熙人物樂春臺。風送春從天上來。玉輦經年不遊幸。上林花好莫爭開。

皇后閣五首

其一

御水冰銷綠。宮梅雪壓香。新年賀交^{一作}泰。白日漸舒長。

其二

萬籟珠簾日。溶溶碧瓦煙。漪漣采荇水。和暖浴靈天。

其三

初欣綵勝迎春早。已覺雞人報漏遲。風色結寒猶料峭。天光照物已融怡。

其四

鶯寒未報宮花發。風暖還催臘雪銷。欲識春來自何處。先從天上斗回杓。

其五

三辰明潤璇璣速。四氣均調玉燭光。共喜新年獻椒酒。惟將萬壽祝君王。

溫成皇后閣四首

其一

璫^{一作}。窗珠戶暖生煙。不覺新春換故年。衆卉爭妍競時態。卻尋遺跡獨依然。

其二

寶奩香歇掩鉛華。舊閣春歸老監嗟。畫棟重來當日鷺。玉欄猶發去年花。

其三

椒壁輕寒轉曉暉。珠簾不動暖風微。可憐春色來依舊。惟有餘香散不歸。

其四

內助從來上所嘉。新春不忍見新花。君王念舊憐遺族。常使無權保厥家。

夫人閣五首

其一

太史頒時令。農家候土牛。青林自花發。黃屋爲民憂。

其二

元會千官集。新春萬物同。測圭知日永。占歲喜時豐。

其三

黃金未變千絲柳。白日初遲百刻香。聖主本無聲色惑。宮花不用妬新粧。

其四

微風池沼輕澌漾。旭日樓臺瑞靄浮。一作四海懽聲歌帝澤。萬家春色滿皇州。

其五

玉殿籤聲玉漏催。綵花金勝巧先裁。宿雲容與朝暉麗。共喜春隨曙色來。

萬壽觀告遷眞宗皇帝御容祝文

伏以宗廟之禮。是爲典彝。衣冠以遊。實有故事。載嚴寶構。以奉威靈。涓吉日以有初。庶眞馭之斯格。

萬壽觀造溫成皇后相儀祝文十二月二十九日

式營叢構。俾俟靈遊。顧落成之有初。惟筮日而斯吉。冀茲往宅。庶以卽安。

皇帝回謝契丹皇帝書

九月日。兄大宋皇帝致書于弟大契丹聰文聖武英略神功睿哲仁孝皇帝闕下。使輅云止。惠問見貽。且承累歲而來。薦有西師之舉。討其不服。初煩剪伐之謀。全以舊恩。終示含容之度。慶武戈之遂息。分軍獲以爲儀。言論斯勤。欣銘併集。方疑寒律。冀保沖襟。企詠之誠。指陳奚既。續遣使人咨謝次。今忠正軍節度使檢校太尉同中書門下平章事肅德等回。專奉書陳謝。不宜白。

皇帝回謝契丹皇太后書

九月日。姪大宋皇帝謹致書于嬪大契丹儀天體道至仁廣德慈順章聖皇太后闕下。隣邦敦睦。結信好以彌深。使聘申歡。承諭言而甚厚。固壽齡之遐福。欣帖泰之休期。加侑幣以惟豐。積感悚而增切。秋商在候。齋願惟和。今忠正軍節度使檢校太尉同中書門下平章事肅德等回。專奉書陳謝。不宜。謹白。

【內制序】取怒。怒一作怨。

【至和元年九月皇帝本命青詞】寶祚。此上一有伏以二字。

【溫成閣春帖子】故年。一作舊年。老監阿監。

卷二

景靈宮奉真殿看經堂開啟眞宗皇帝忌辰黃籙道場青詞正月十一日

伏以崇妙道於清虛。實惟先志。感時恩於雨露。式表孝心。按金籙之眞科。卽琳宮之福地。薦茲精潔。庶以感通。冀善應之無方。期永資於沖陰。

景靈宮廣孝殿看經堂開啟章懿皇后忌辰黃籙道場青詞正月十一日

伏以坤儀永闕。昭厚德於無疆。藥館載嚴。奉真遊而如在。式臨遠諱。用感孝思。薦時品之惟新。啟齋場而增廣。仰祈歆鑒。永集祥祺。

慈孝寺開啟真宗皇帝忌辰資薦道場齋文正月十一日

伏以僊馭乘雲。式臨於遠日。春陽濡露。載感於孝思。爰卽梵居。俾延淨侶。瞻玉毫之妙相。啟貝葉之真文。集此勝因。仰資冥祐。

集英殿開啟真宗皇帝忌辰道場齋文正月十一日

伏以神遊斯遠。方仰於軒威。諱日茲臨。載深於舜慕。虔依正覺。俾集善因。敬禁殿以有嚴。啟法筵而夙設。仰祈冥助。用慰孝思。

內中福寧殿罷散三長月道場青詞正月十七日

伏以首春紀序。標令月以惟時。善氣宣和。紛百祥而來集。載嚴祕殿。恭按真科。依妙消之冲虛。薦清一作。哀之獨潔。冀迎純祐。均被羣倫。

撫問真定府定州等路臣寮口宣正月二十二日

汝等並輟時才。出分邊寄。屬新陽之戒候。念宣力以惟勞。特示撫存。體茲眷遇。

撫問保州路臣寮口宣正月二十一日

汝等夙臨邊圉。盡瘁公家。當春序之方和。念朔陲之尙凜。俾茲撫慰。式示眷懷。

撫問北京并恩州臣寮口宣正月二十二日

汝等並膺東寄。方布教條。惟夙夜之宣勤。在眷懷而彌切。特加存撫。宜體優隆。

雄州撫問契丹賀乾元節人使口宣二月二十三日

卿等並持使節。叶講隣歡。飭車馭以載勞。及疆亭而茲喜始。一作俾仲慰撫。式示眷懷。

贈保順軍節度使張惟吉祭文堂祭二月二十六日

維至和二年歲次乙未三月己未朔。皇帝遣入內侍省內西頭供奉官勾當延福宮康爲政致祭于贈保順軍節度使張惟吉之靈。惟靈忠勤之節。克保於有終。存歿之恩。備隆於異數。仍加祖奠。式表哀榮。尙享。

贈保順軍節度使張惟吉祭文墳所二月十六日

惟靈佐佑宜力。始終不渝。載嘉遺忠。實用追側。奠爾臨壙。魂其有知。

賜契丹賀正旦人使卻回班荆館酒果口宣十二月二十九日

卿等並持信節。繼講隣歡。既夙駕以言歸。俾及郊而留餞。宜伸寵錫。用示眷懷。

賜鎮安軍節度使同中書門下平章事判陳州程琳進奉乾元節詔三月十五日

誕祥著節。延祝申誠。顧予問德之臣。首列充庭之貢。式彰勤懇。深用歎嘉。

賜外任臣寮進奉乾元節銀絹馬等詔敕書同三月十五日

夏時正候。誕節戒辰。惟事君之盡忠。因效貢而申祝。嘉乃勤意。勿忘于懷。

賜樞密使河陽三城節度使同中書門下平章事王德用生日禮物口宣三月二十五日

卿勳閭名家。樞機重任。式因誕日。用示優恩。宜體眷懷。膺茲蕃錫。

廣聖宮開啟乾元節青詞三月二十五日

伏以月旅正陽。當百嘉之茂盛。祥標誕節。期萬壽之穹隆。式案舊章。載嚴祕殿。延紫霄之飛馭。誦玉笈之靈篇。

伏冀誠懇上通。聖真垂佑。錫之多福。均動植之幽微。永以無疆。並乾坤而悠久。

撫問河東路沿邊臣寮夏藥口宣三月二十五日

汝等並膺寄任。深東器能。顧隆暑之惟時。念禦邊之宣力。俾分珍劑。式示眷懷。

撫問麟府路一路字。臣寮及并代州路臣寮口宣三月十五日

汝等蒞有時才。並分邊寄。顧蘊隆之在候。嘉勤瘁以不忘。式示撫存。體茲東注。

撫問宣徽南院使彭信軍節度使判真定府李昭亮口宣四月六日

卿宣勞邊鄙。頗歷歲時。因乃子之言行。俾過家而賜問。式彰寵眷。以耀私門。

錫慶院賜宰臣已下罷乾元節道場酒果口宣

卿等任國鈞軸。爲予股肱。因誕節之屆辰。嚴焚宮而申祝。載嘉忠藎。宜示寵頒。

端午帖子詞二十首三月二十五日

皇帝閣六首

其一

天清槐露過。歲熟麥風涼。五日標嘉節。千齡獻壽觴。

其二

午位星杓正。人間令節同。四時和玉燭。萬物被薰風。

其三

舜舞來遐俗。堯仁浹九區。五兵消以德。何用赤靈符。